


Aruba tin un caso di un mucha di 5 aña cu ta adicto

Tin mas cu 100 mucha cu na un edad di entre 12 cu 19 aña a experiencia alcohol y droga



ORANJESTAD (AAN): Universidad di Aruba a laga haci un investigacion riba e situacion di droga bao di nos muchanan. Den aña 2010 y 2012 Universidad di Aruba a haya un encargo di coordinatie drugs bestrijding, ex minister di Salubridad publico personalmente e tuma over e proyecto unda cu ex minister a duna ordo pa Universidad di Aruba caba cu e investigacion.

Segun Drs. Ing. Herbert Diaz cu a keda encarga cu e proyecto ta duna di conoce cu e investigacion ta importante pa Aruba. E investigacion cu a wordo haci ta focus riba e problematica di droga cu tin y cu ta creciendo. Na aña 1979 tabata tin un investigacion cu a wordo haci caba.

E tempo ey Fundini su investigacion tabata mas amplio debi cu nan a midi unda e impacto social cu e situacion di droga tin riba nos comunidad. Segun sr. Diaz e tempo ey e average di 11 mil hende cu tabata mas of menos 11% di e poblacion cu tabata uza droga.

Despues di e investigacion a pasa 15 aña unda cu ningun hende no a laga haci ningun sorto di investigacion riba e tereno aki mas. Sinembargo na 2012 a termina cu e investigacion pidi door di ex minister di salubridad di e rapport "De Drugs Problematiek in Aruba schoolenquete 2011-2012".


Hopi ta e informacionnan cu a ricibi di loke ta pasando na e scolnan secundario incluyendo EPB y EPI, tambe kico ta pasando den e fundacion nan unda cu e adicto pisa ta buscando ayudo. Den e raport aki tambe tin resultado di kico y con e adictonan ambulante ta riba caya. Den tur parti a haci cuater investigacion separa y for di e separacion aki a sali tres raport.

E tres raport a trece padilanti loke ta e situacion

actual den e mundo di droga na Aruba. E resultado no ta pa evalua e impacto social, pero pa haya informacion pa por cana riba un miho cuida riba e tereno aki.

E investigacion a bay riba grupo di hobennan cu ta bay scol no esnan cu a kita for di scol. E hobennan cu ta bay scol a forma un poblacion di mas cu 8mil hoben cu 95% di nan edad ta cay entre 12 pa 19 aña. Den e resultado aki 55% di e hobennan ta admiti cu den e edad cu nan tin ya nan tin experiencia regular cu alcohol. Un 35% no a duna ningun contesta cu ta pone e sospecho cu e grupo cu ta den contacto y cu ta uza alcohol por ta hopi mas grandi unda y por yega te cu 90%.

Segun sr. Diaz riba e tereno di droga ilegal 23% di e hobennan ta admiti cu tin experiencia cu droga ilegal. E porciento ta hopi halto den un grupo di mucha entre 12 pa 19 aña. Tambe mas cu 100 mucha a duna di conoce cu na un edad menos cu 12 aña ya caba nan tabata tin experiencia cu alcohol y droga. E situacion aki ta



un situacion cu ta tuma luga na cas y na scol nan basico.

Den e parti aki Sr Diaz a pone como recomendacion pa haci un investigacion na scolnan basico den 5de y 6de klas. Ta lamentable pa bisa cu ya caba Aruba tin un caso di un mucha di 5 aña cu ta adicto y cu tin mester di ayudo. Esakinan ta casonan extremo y cu ta yiu di mama y tata cu ta adicto unda cu nan ta influencia e mucha y e mucha na un edad hopi hoben ta bira un adicto. Loke cu a sali tambe di e investigacion ta cu e casonan aki no ta cuminsa na scol pero na cas. Sinembargo na momento cu e mucha bay scol y ta bin cu e problema aki e ta comparti esaki cu su amigo of amiganan di scol y na unda cu e situacion ta crece na e scolnan.

Na scol e muchanan ta encontra otro y ta crea social network. Den e investigacion tambe a sali cu hopi mucha no ta suficientemente fuerte unda cu nan falta hopi forza di caracter pa nan por resisti e presion cu tin na scol.

Alcohol ta un droga legal y hopi peligroso. Segun sr. Diaz alcohol pa circunstancianan di historia e alcohol a wordo legaliza y e legalizacion aki a trece hopi puntanan robes cu ne. Mas di un persona ta pensa e droga ta legal y nan mas di uze of cu e no ta nada robes cu nan ta haciendo.

Gobierno por duna di su parti, unda cu tin un ley existente cu ta bisa cu bo no

por bende alcohol na menor di edad. Lamentablemente Aruba no tin un bon control riba e ley aki. Sinembargo si mester bay haci bon control e boet cu e ley ta exige cu tin pa violacion di e ley aki ta insignificante.

Sr. Diaz a duna di conoce cu Aruba mester puntra su mes seriamente kico ta loke e kier. E problematica aki bao di nos hobennan ta un problema di comunidad unda cu gobierno y organizacionnan cientifico, scolnan, nos tur mester uni y sa berdaderamente ta kico nos kier. Abase di e decision cu wordo tuma mester bin cu un manejo cu ta controla e ley aki di un manera mas efectivo.